

Općina Stari Grad
Sarajevo



Municipality of the
Old Town Sarajevo

Besplatan primjerak

septembar, 2009. godine.



starogradski haber



2 Posjeta visokog predstavnika
Valentina Inzka



7 Spektakl na Koševu



14 Iftari u Općini Stari Grad

4 Predstavljamo Vam četiri ka-
pitalna projekta Općine Stari
Grad

6 8., 9. i vanradna sjednica
Općinskog vijeća

8 15. Sarajevo film Festival

9 Nagrade za učenike
generacije i podjela školskog
pribora za 300 učenika

10 Dogradnja Osnovne škole
"Vrhbosna"

18 Predstavljamo Vam Mjesnu
zajednicu "Bistrik"

19 "Hodidjed i Bijela tabija"

Visoki predstavnik Valentin Inzko posjetio Općinu Stari Grad



Visoki predstavnik u BiH Valentin Inzko posjetio je Općinu Stari Grad Sarajevo. Bila je ovo prva posjeta Visokog predstavnika jednom Organu lokalne uprave na području Grada Sarajevo. Načelnik Ibrahim Hadžibajrić je na razgovore sa Visokim predstavnikom pozvao i načelnika Općine Istočni Stari Grad Boju Gašanovića kako bi dogovorili konkretne mjere međuentitetske saradnje. Primjer te saradnje najbolje se ogleda u projektu koji je zaživio prije nekoliko mjeseci, a to je uspostava kombi linije prema Hreši, što je pohvalio i sam Visoki predstavnik naglasivši da je najvažnija upravo ta komunikacija među ljudima. Načelnik Hadžibajrić je istakao da jedna od tema razgovora bila izgradnja puta kod Kamenoloma Lapišnica koji se jednim dijelom nalazi na teritoriji RS-a, a drugim u Federaciji. Dogovorena je saradnja, odnosno razmjena ideja i mišljenja po pitanju regulacionih planova na potezu Trebevića u čemu će dvije Općine pomagati jedna drugoj. Osim toga, dogovoreno je da neće doći do izgradnje deponije smetlišta na Borijama što bi direktno ugrozilo stanovnike Općine Stari Grad Sarajevo. Kako je naglasio načelnik Hadžibajrić, od Visokog predstavnika je zatraženo da ubrza rješenje problema Jajce kasarne, čime bi između ostalog bio riješen problem zapošljavanja 100-tinjak ljudi. Načelnik Istočnog Starog Grada Bojo Gašanović je istakao odličnu saradnju dvije Općine i naglasio kako je ovo jedan u nizu sastanaka koji su načelnici već imali u cilju rješavanja problema infrastrukture i potreba svojih građana. S obzirom da teritorija Općine na čijem je on čelu obiluje prirodnim ljepotama, jedna od ideja je razviti Eko-turizam, te je od Visokog predstavnika zatraženo da pomogne u iznalaženju finansijskih sredstava. Načelnik Gašanović je predložio Visokom predstavniku da u tom smislu poveže Istočni Stari Grad sa sličnim općinama u Austriji, te da ih uputi kako što brže pristupiti IPA fondovima. Cilj je napraviti atraktivnu turističku destinaciju na Trebeviću ili Crepoljskom, te privući strane investitore.

Visoki predstavnik u BiH Valentin Inzko je rekao da se rado odazvao pozivu Načelnika Hadžibajrića da prisustvuje ovom sastanku jer, iako je često u prilici da razgovara o visokoj politici, i ona je potrebna

BiH, poput posjete Josepha Bidena i Havijera Solane našoj zemlji 19. maja, ovo je shvatio kao priliku da se naglasi važnost Općina, te da se svakodnevni život građana odvija upravo tu. Visoki predstavnik je podržao saradnju oba Stara Grada, kao što podržava svaki oblik saradnje između dva entiteta, te im zaželio progres. Osim toga, Visoki predstavnik je naglasio kako je rijetkost da jedan evropski grad ima takvu blizinu planina i planinskih ljepota, kao što je slučaj sa Sarajevom i Trebevićem. On je zaželio da se Trebeviću vrati stari sjaj i mogućnost da, kao nekada, građani mogu svakodnevno poslije ručka otići na izlet na ovu planinu.

Navodeći primjere iz prošlosti, Inzko je spomenuo Francusku i Njemačku kao dva najveća neprijatelja u Evropi tokom francusko-pruskog, te I i II Svjetskog rata koji su odnijeli milione žrtava. Danas su ove dvije



zemlje stubovi dobrog prijateljstva u Evropskoj zajednici i njihov primjer bi mogao poslužiti kao model i za našu zemlju, pa i ove dvije Općine.

Po pitanju finansijskih sredstava kojima bi bili pomognuti zajednički projekti Općina Stari Grad i Istočni Stari Grad, Visoki predstavnik je rekao da ukoliko ima nekih evropskih sredstava on će ih vrlo rado aktivirati. Naglasio je da Evropa podržava međudržavne projekte, što ovdje nije slučaj, ali da se to treba prevazići i podržati projekte poput ovih jer cilj je jedan, a to je interes građana.

Predstavljamo Vam četiri kapitalna projekta Općine Stari Grad

BESARINA ČIKMA

Jedan od kapitalnih projekata Općine Stari Grad koji će biti završen do kraja godine je Besarina čikma, objekt koji je u vlasništvu Općine, a gdje se trenutno nalaze dva poslovna prostora koji su u prethodnom periodu bili pod zakupom i jedan stan čiji vlasnik nije općina nego fizičko lice. S obzirom da je taj stan u jako lošem stanju i svakog momenta može doći do rušenja, sa vlasnicom je postignut dogovor na obostrano zadovoljstvo. Naime, investitor radova Boosline d.o.o je preuzeo obavezu izgradnje novog stana koji će vlasnica moći otkupiti (45 m²) s obzirom da posjeduje sva prava. Osim toga, investitor je dužan da izgradi četiri poslovna prostora (dva za Općinu, dva za investitora), čime se dobija potpuno nov objekt sa novom infrastrukturom i rješava pitanje jednog nosioca stanarskog prava. Prethodno će se pristupiti rušenju postojećeg objekta i raščišćavanju terena. Trenutno se čeka izdavanje odobrenja za gradnju koje bi trebalo biti gotovo najdalje do 05. septembra ove godine. Od dana dobijanja odobrenja rok za završetak tzv. grubih radova je 45 dana. Projekat je radio renomirani arhitekta Mufid Garibija, specijaliziran za objekte u zoni mahala i čaršije, koji

je prethodno uradio projekat Musluk česme. Općina Stari Grad će ovako na najbolji način riješiti problem starog, ruševnog objekta u dogovoru sa investitorom, a da se pritom ne odriče imovine. Ovo bi moglo poslužiti kao primjer za rješavanje drugih objekata na području Bašćaršije koji su u sličnom stanju, s obzirom da Općina kao organ uprave ne raspolaže dovoljnim sredstvima za tu svrhu. Radovi na izgradnji zamjenskog stambeno-poslovnog objekta Besarina čikma bi trebali biti završeni do kraja jeseni, a vrijednost se procjenjuje na 320.000,00 KM.



KVADRANT 12

Kvadrant 12 (sada poznat kao "Ceker pijaca") je budući poslovni objekt u vlasništvu Općine Stari Grad koji se nalazi između ulice Mula Mustafe Bašeskije i Dženetića čikme. Zamišljen je kao interpolacija između dvije postojeće zgrade, a na tom prostoru se sada nalaze privremeni objekti koji su u fazi rješavanja. Kvadrant 12 će imati suteran, međuetazhu, prizemlje, dvije etaže i potkrovlje, a kon-

strukcijski će pratiti fasade okolnih objekata kako bi se uklopio u ambijent Starog Grada. Kvadratura objekta je oko 2000 m², a predviđen je i manji parking iz dijela ulice Dženetića čikma. Unutar Kvadranta će biti poslovni prostori različitih struktura i veličina. Projekat je radio arhitekta Nedim Hadžiabdić, a veći dio prostora biće iskorišten za prodajni prostor: supermarket sa skladištem i podrumom, servisnim dijelovima itd. Investitor ovog projekta je Općina Stari Grad, a objekt će se graditi sredstvima koja su prikupljena na osnovu prodaje poslovnih prostora koji se odvijaju prema važećoj općinskoj odluci. Sredstva od prodaje tih prostora uplaćuju se na poseban račun i biće iskorištena za gradnju Kvadranta 12. Procjenjuje se da je vrijednost ovog projekta između 2,5 i 3 miliona maraka, a rok trajanja gradnje zavisice upravo od prikupljenih sredstava. Općina će pratiti i nadzirati izgradnju, a kako nijedna gradnja u centralnom gradskom jezgri ne može proteći bez problema, očekuje se da će i u ovom slučaju biti poteškoća jer je u blizini gradilišta saobraćajnica, pijaca, a problem bi se mogao javiti i kod izmještanja korisnika koji nisu redovne platiše Općini. Naime, samo dva korisnika s tog prostora, a to su Sarajevska Pivara i Opresa redovno izmiruju svoje obaveze. Tender se otvara 17. septembra i tada će biti poznat izvođač radova, tako da bi radovi trebali početi 01. oktobra 2009. godine.



PODZEMNE GARAŽE

Izgradnja garaža na području ulice Tekija čikma je još jedan projekat Općine Stari Grad koji će biti realizovan u skorijoj budućnosti, a koji rješava jedan

od ključnih problema ove Općine, a to je nedostatak parking prostora. Zemljište na kojem će se graditi garaže je u suvlasništvu Općine Stari Grad i Gazihusref begovog Vakufa koji su skopili sporazum o investiranju u ovaj projekat. Na prijedlog Vakufa, investitor projekta je firma Suncokret d.o.o koji će

biti korisnici garaža na određeni broj godina. Prije početka gradnje važno je riješiti još nekoliko pitanja. Naime, na lokalitetu postoje određeni tereti u smislu uslovno riješenih imovinsko-pravnih pitanja, odnosno jedan objekat u ruševnom stanju i dva stambena prostora sa čijim vlasnicima je postignut dogovor o zamjenskim stanovima. Projekat garaža rađen je prema smjernicama i mišljenju Zavoda za planiranje uz saglasnost Ministarstva saobraćaja Kantona Sarajevo. Kapacitet višeeetažnih garaža koje će biti na komercijalnoj osnovi iznosiće 150-180 parking

mjesta. Vrijednost projekta se još ne zna, a biće poznata kada se definiše kvadratura i investitor objavi red veličine i cijene koštanja. Inače, ovakav objekat je drugačiji i zahtjevniji od uobičajenih prvenstveno zbog lokacije, blizine okolnih zgrada i nedostatka prostora. Međutim, i pored svega toga, ovaj objekat će riješiti problem saobraćaja u mirovanju za mnoge poslovne objekte u blizini, uključujući i Hotel Central koji ima mnogo korisnika, a ne postoji parking prostor.

NA-MA

Još jedan kapitalni projekat koji je u planu za sljedeću godinu je rekonstrukcija objekta NA-MA (Narodni magazin) koji se nalazi u ul Zelenih beretki 22, a koji je također u ruševnom stanju. Ovaj devastirani objekat je već dva puta bio na konkursu, ali nije bilo zainteresovanih investitora. Načelnik Ibrahim Hadžibajrić je potom zadužio Općinsko vijeće da stupi u kontakt sa eventualnim investitorima nakon čega su počeli pregovori sa firmom iz Irske,

koji su već uspješno renovirali Hotel Central. Sa firmom Templeville development limited ltd BiH d.o.o. Sarajevo postignut je dogovor o izgradnji objekta na površini od 1362,68 m² uz mogućnost povećanja za dodatnih 82,11 m². Što se tiče samog objekta, riječ je o proširenju djelatnosti već postojećeg Hotela Central, dakle: hotel, fitness klub, wellness centar, sobe, restoran... Planirano je da radovi traju 15 mjeseci od dobijanja građevinske dozvole, a za troškove rekonstrukcije objekta biće utrošeno oko 1,5 miliona maraka.

Potpisan Protokol između dvaju starogradskih općina

Načelnici općina, Bojo Gašanović - Istočni Stari Grad i Ibrahim Hadžibajrić - Stari Grad Sarajevo, 03. avgusta 2009. godine u prostorijama Općine Stari Grad Sarajevo, potpisali su Protokol o zajedničkom istupu prema Ministarstvu za ljudska prava i izbjeglice Bosne i Hercegovine.

Protokol sadrži namjeru Opštine Istočni Stari Grad, koja u narednom periodu planira aktivnosti na projektu rješavanja fekalne kanalizacije u naselju Drljevac čija vrijednost iznosi cca 50.000,00 KM.

Korisnici ovog projekta su stanovnici pomenutog

naselja i dva privredna subjekta, kao i šira zajednica Opštine Istočni Stari Grad. Zbog mogućeg zagađenja okoline fekalnom kanalizacijom postoji ozbiljna prijetnja da dođe do onečišćenja izvorišta rijeke Moščanice u naselju Faletiči to bi moglo dovesti do nesagledivih posljedica kako za Opštinu Istočni Stari Grad, tako i za Općinu Stari Grad Sarajevo.

Načelnici Protokolom upoznaju ministra Safeta Halilovića da Opština Istočno Sarajevo i Općina Stari Grad Sarajevo ne raspolažu finansijskim sredstvima kojima bi mogli realizovati ovaj projekat, pa stoga mole da u okviru svojih mogućnosti pomogne u rješavanju ovog problema obezbjeđenjem određenih finansijskih sredstava.

Potpisan protokol o saradnji na projektu Firuz-begovog hamama

Općini Stari Grad 23. juna 2009. godine potpisan je Protokol o saradnji na projektu revitalizacije Firuz-begovog hamama. Potpisnici protokola su Ibrahim Hadžibajrić načelnik Općine Stari Grad i Džejna Bajramović direktorica marketinga Fabrike Duhana Sarajevo d.d. Sarajevo. Općina Stari Grad Sarajevo kao jedinica lokalne samouprave dala je punu podršku revitalizaciji objekta Firuz-begovog hamama na način i u obliku koji će biti definisan nakon istražnih radova i odobren od strane nadležnih institucija za zaštitu spomenika kulturno historijskog i prirodnog naslijeđa. Općina se obavezala da će investitoru budućeg projekta obezbjediti svu administrativnu podršku vezanu za izdavanje potrebnih odobrenja i saglasnosti. Fabrika duhana Sarajevo d.d. Sarajevo, kao investitor ovog projekta, preuzela finansijske i druge obaveze u vezi sa revitalizacijom Firuz-begovog hamama uz obavezu pridržavanja svih pozitivnih propisa kojima su regulisana pitanja gradnje, zaštite i dr.





8. Sjednica Općinskog vijeća

Osmna sjednica Općinskog vijeća Stari Grad održana je 25. juna 2009. godine. Pored ponuđenih 17. tački dnevnog reda, neposredno pred početak sjednice dodate su još 3. tačke i to:

1. «Informacija o izvršenoj reviziji poslovanja Općine Stari Grad za 2008. godinu od strane revizorske kuće»;
2. «Prijedlog Odluke o preraspodjeli Budžetskih sredstava»;
3. «Nacrt Odluke o proglašavanju ulica Ferhadija i Maršala Tita od posebnog interesa za Grad Sarajevo».

O svim tačkama dnevnog reda se konstruktivno raspravljalo, gdje su uz određene sugestije pojedine tačke dopunjene, a zatim jednoglasno usvajane. Vrijedno pažnje je istaći dodatnu tačku dnevnog reda «Nacrt Odluke o proglašavanju ulica Ferhadija i Maršala Tita od posebnog interesa za Grad Sarajevo». Općinsko vijeće Starog Grada je jednoglasno donijelo Zaključak kojim se protivi uvrštavanju na dnevni red sjednice Gradskog vijeća, zakazane za 30. juni 2009. godine Nacrta Odluke o proglašenju ulica Ferhadija i Maršala Tita od posebnog interesa za Grad Sarajevo. Vijećnici predlažu da gradonačelnik povuče tekst Nacrta Odluke iz dalje procedure. U suprotnom, radi se o direktnom kršenju Ustava KS i niza zakonskih propisa. «Tražili su da budu vlasnici ulica i ja sam to odmah odbio. Ne smeta mi saradnja, ali uz sporazum i javnu saglasnost. Takođe, nemam ništa protiv da reklame u Ferhadiji od koji godišnje imamo 12.000 KM kontrolišu općinske i gradske inspekcije. Grad nam je tražio 10%, a ja sam im odobrio 50% zarade od reklame» rekao je načelnik Ibrahim Hadžibajrić.

9. Sjednica Općinskog vijeća

Deveta sjednica Općinskog vijeća Stari Grad Sarajevo održana je 16. jula 2009. godine. Dnevni red Općinskog vijeća sa 14 tačaka proširen je sa još 4 tačke:

- (13.) Informacija o aktivnostima na prolomu Vratnik, u ulici Abdulaha efendije Fočaka br. 82;
- (14.) Saglasnost Općinskog vijeća na sporazum sa Općinom Kepez Antalija;
- (15.) Saglasnost Općinskog vijeća na sporazum o saradnji na proglašenju ulice Ferhadija i dijela ulice

Maršala Tita od posebnog interesa za Grad Sarajevo;

- (16.) Informacija o dodjeli poslovnog prostora – objekta "NA-MA";

Sve su tačke o kojima se izjašnjavalo glasanjem usvojene jednoglasno osim 15. tačke za koju je trebalo dvotrećinsko glasanje, koja nije dobila potrebnu većinu. O svim se tačkama raspravljalo da se dođe do najboljih rješenja, a 15. tačka je podijelila vijećnike. Neki vijećnici nisu mogli da se oslobode osjećaja da ih Gradsko vijeće ne doživljava kao partnere već kao instrument svoje volje. Naime, Gradsko vijeće je stavilo Nacrt odluke u javnu raspravu za koji je predhodno trebao Zaključak Općinskog vijeća. U međuvremenu gradonačelnik Alija Behmen i načelnik Općine Stari Grad Ibrahim Hadžibajrić postigli su sporazum o saradnji na proglašenje ulice Ferhadija i dijela ulice Maršala Tita od posebnog interesa za Grad Sarajevo na koji je Općinsko vijeće trebalo da da svoju saglasnost. Sporazum čelnika Grada i Starog Grada nije mogao dobiti saglasnost Općinskog vijeća pa se ova tačka prolongirala za narednu sjednicu Općinskog Vijeća.

Vanredna sjednica Općinskog vijeća

Vanredna sjednica Općinskog vijeća Stari Grad Sarajevo održana je 29. jula 2009. godine.

Dnevni red je sadržavao 3. tačke koje su skoro jednoglasno usvojene. Zanimljivo je istaći 1. tačku dnevnog reda.

Tačka 1. «Prijedlog Odluke o davanju saglasnosti na zaduženje Općine Stari Grad Sarajevo i zaključenje Ugovora o kreditu sa Razvojnog bankom Federacije Bosne i Hercegovine».

Mustafa Lačević, zamjenik predsjedavajućeg Općinskog vijeća je prisutnim iznio nastale okolnosti oko realizacije kredita.

Ovaj kredit od 1.000.000,00 KM plus vlastita sredstva 100.000,00KM realizuju dva projekta:

- Rekonstrukcija saobraćajnice Iza Gaja – Pogledine – Dolovi, odnosno projekat saobraćajnice i kanalizacije sa 955.000,00KM
- Sanacija proloma tla na lokalitetu Vratnik sa 145.000,00KM

Prijedlog Odluke je usvojen sa 25 glasova za i 1 protiv.



Harijev spektakl na Koševu

"Koliko je Koševo, tolika je bila moja želja da večeras budem s vama," ovim riječima na Koševu je počeo koncert Hari Mata Harija, jednog od najtalentovanijih i najpopularnijih muzičara koje je iznjedrio ovaj grad. Prošlo je više od 40 godina otkako je sedmogodišnji dječak sa Vratnika hrabro zakoračio u svijet muzike oslanjajući se samo na svoj talenat i savjete rahmetli dede, poznatog sevdalije. Na isto to mjesto, Dom kulture na Vratniku, Hari se vratio i 40 godina kasnije promovirao svoj novi album "Sreća" i najavio ostvarenje svoje životne želje, koncerta na Koševu! A, kad čovjek nešto iskreno i svim srcem želi, sve sile ovog svijeta udruže se da mu pomognu u tome. Hariju je pomogla Općina Stari Grad koja je bila organizator koševskog spektakla i obezbijedila podršku u tehničkom i institucionalnom smislu. Iako se obraćao mnogim institucijama, Hari je na razumijevanje naišao tek kod načelnika Općine Stari Grad, Ibrahima Hadžibajrića koji je prepoznao značaj ove manifestacije za kulturu uopće, a samim tim i za Općinu, odnosno Grad. Koncert "Sreća" bio je poklon Sarajevu i Sarajlijama, ali i brojnim drugim ljubiteljima Harijeve umjetnosti koji su tog 10. avgusta u kolonama pristizali na stadion Koševo. Skoro 50.000 ljudi slilo se iz svih dijelova BiH, ali i regije na najveći bh stadion i sa Harijem te večeri podijelilo njegovu "Sreću". Iako je koncert bio besplatan, ulaz je bio moguć jedino sa kartama, a vjerovatno po prvi put u historiji ovog grada zabilježeno je da je 40.000 karata podijeljeno za samo nekoliko sati. Za ugledne zvanice, tzv. VIP, obezbijeđen je veći dio zapadne tribine, a želja uglednih ličnosti sa javne i političke scene naše zemlje da budu dio ovog spektakla, još jednom potvrđuje Harijevu popularnost. A, kako je ona odavno premašila granice naše zemlje, ne iznenađuje činjenica da je na koncert u Sarajevo doputovao čak i gradonačelnik Ljubljane Zoran Janković. Kao specijalni gosti na impresivnoj sceni visokoj skoro 30 metara pojavili su se Nina Badrić, Dino Merlin, Dražen Žerić-Žera, Eldin Huseinbegović i Halid Bešlić. Upravo posljednji gost, Halid Bešlić i njihova zajednička izvedba pjesme nastale prije više od 30 godina "Poletjela golubica" izazvali su najveće

oduševljenje mase, a svi na stadionu Koševo horski su zapjevali sa našim zvijezdama. Iako relativno mlad muzičar, Eldin Huseinbegović također je osvojio simpatije mnogobrojnih posjetitelja koji su sa njim i Harijem uglas otpjevali "Tvoje je samo to što daš". Oduševljenje zbog prijema sarajevske publike nije krila ni gošća iz Hrvatske Nina Badrić sa kojom je Hari izveo duet "Ne mogu ti reći šta je tuga". Ipak, stadion se zaorio kada se našem "slavuju sa Vratnika" kako često nazivaju Harija pridružio Čarobnjak, Dino Merlin i kada su krenuli prvi taktovi hita "Dabogda". Sve u svemu bila je to noć za pamćenje... U želji da izađe u susret Hariju, načelnik Općine Ibrahim Hadžibajrić je uputio poziv vlasnicima privatnih objekata sa teritorije Općine da se uključe u projekat i pruže finansijsku podršku u skladu sa njihovim mogućnostima. Značajan dio sredstava obezbijedili su upravo oni, te je i njihov doprinos ovoj manifestaciji ogroman. Posebnu zahvalnost Općina upućuje vlasnicima objekata: Slastičarna "Saraj", Slastičarna Sport, Čevabdžinica "Željo 1" i Čevabdžinica "Željo 2", Čevabdžinica "Hodžić", Mesnica "Hodžić", firma Ibes-staklo, Badem, d.o.o. Mibral, građevinskoj firmi "Bosline" i građevinskoj firmi d.o.o. Klico, te Hotelu Evropa i Benzinskoj pumpi Hifa. Također, Općina je na sebe preuzela obaveznu izradu reklamnih majica koje su uradili uposleni firme "Pismolik", čime se njima izašlo u susret u smislu umanjanja dugovanja koje imaju prema Općini. Općina Stari Grad je, osim navedenog, pružila podršku u tehničkom smislu po pitanju sklapanja dogovora oko iznajmljivanja stadiona "Asim Ferhatović-Hase", zatim podršku u reklamnoj kampanji sa firmama Europlakat i Metro-media, obezbjeđivanjem lokacije za podjelu besplatnih karata, te kreiranju opće pozitivne atmosfere na području Općine povodom ove manifestacije. I, kao što je rekao Načelnik Hadžibajrić, Općina Stari Grad jeste najstarija gradska Općina, ali je u nekim stvarima, poput organizacije manifestacija od izuzetnog značaja ne samo za Općinu, nego i za cijeli grad, tj. državu, Stari Grad najmlađa Općina koja bi mogla poslužiti za primjer svim ostalim.

Općina Stari Grad podržala 15. Sarajevo Film Festival



Nastavak saradnje Sarajevo Film Festivala sa Općinom Stari Grad ozvaničen je 3. jula 2009. godine potpisivanjem Ugovora o pokroviteljstvu i nastavku sufinansiranja ovogodišnjeg Festivala.

«Općina Stari Grad sa svim svojim kapacitetima i mogućnostima se stavlja na raspolaganje Sarajevo Film Festivalu što je već postalo tradicionalno. U narednom vremenskom periodu Općina Stari Grad će u skladu sa svojim mogućnostima pomagati Festival, jer je to manifestacija koja je odavno prevazišla granice ove regije» rekao je prilikom potpisivanja načelnik Ibrahim Hadžibajrić. Općina Stari Grad je otišla i korak dalje u podršci 15. SFF-a, te je tako upriličen svečani prijem 18. avgust 2009. godine. U restoranu Bijela tabija organizovan je prijem za učesnike, goste i organizatore 15. Sarajevo Film Festivala, te ostale pripadnike javne i političke scene našeg grada i države. Vidjevši u ovom festivalu mogućnost promoviranja kulturno-historijskog nasljeđa i mnogobrojnih znamenitosti Starog Grada, Načelnik Hadžibajrić je u pozdravnom govoru istakao : "Poznato je da tokom Sarajevo Film Festivala naš grad postaje stjecište mnogobrojnih autora, glumaca, umjetnika, kao i turista iz svih dijelova svijeta, a prije ili kasnije njihova odrednica postaje stari dio grada, Baščaršija, Ferhadija". Ugledne goste poput našeg oskarovca Danisa Tanovića, direktora filmskog odjela Cannes Film festivala Christiana Jeunea, holivudskog glumca Stellana Skarsgarda poznatog po ulogama u filmovima "Pirati sa Kariba", "Mama Mia", "Anđeli i demoni" i drugih, načelnik Hadžibajrić ugostio je na Tabiji, mjestu koje je nekada bilo dominantan vojni objekat u sklopu Vratnika, sa prelijepim pogledom na Sarajevo. Prijemu su prisustvovali i glumice Marija

Škaričić i Anamaria Marinca, te glumac Horacio Camandule, a u društvu načelnika Hadžibajrića navise su bili načelnik Općine Novo Sarajevo Nedžad Koldžo i predsjedavajući Kantonalnog vijeća Denis Zvizdić. U želji da gostima približe tradiciju sarajevskog akšamlučenja, organizatori su ih dočekali popularnom smrekom i šljivovicom, te počastili bosanskim specijalitetima. Direktor Festivala Mirsad Purivatra se zahvalio Općini Stari Grad na odličnoj višegodišnjoj saradnji. "Bijela tabija je bila srce za Šeher jer je davala tonus životu Sarajlija, jednako kao što danas taj tonus našim životima daje Sarajevo Film Festival koji se s pravom naziva najboljim regionalnim festivalom. Neki ga zovu i "balkanskim Kanom", a svako od nas ga doživljava na različit način, no izvjesno je da je njegov doprinos našoj Općini, Gradu i čitavoj BiH, kao i kulturi življenja uopće, neizmjeran," rekao je načelnik Hadžibajrić.



Nagrade za učenike generacije 2008/2009. školske godine

Općinski načelnik Ibrahim Hadžibajrić 11. juna 2009. godine upriličio je prijem za učenike generacije 2008/2009. školske godine, iz sedam osnovnih škola sa područja Općine Stari Grad Sarajevo. Tom prilikom, Načelnik je učenicima generacije

čestitao na dosadašnjem postignutom uspjehu, te im je uručio dvije knjige, novčanu nagradu od 300 KM i ružu. Prijemu u Općini su prisustvovali direktori škola i roditelji najboljih osnovaca. Najbolji učenici su aktivisti mnogih sekcija, učestvovali su na mnogobrojnim takmičenjima iz raznih oblasti, a slobodno vrijeme provode radeći na računaru i družeći se sa prijateljima uz razne sportove.



Učenici generacije za školsku 2008/2009. godinu su:

- Žiško Nirvana
OŠ «Saburina»
- Bevrnja Mustafa
OŠ «Mula Mustafa Bašeskija»
- Oħranović Amila
OŠ «Edhem Mulabdić»
- Baković Maida

- OŠ «Hamdija Kreševljaković»
- Pršeš Kenan
OŠ «Šejh Muhamed ef. Hadžijamaković»
- Hasanović Berina
OŠ «Vrhbosna»
- Perković Ivan
MOŠ «Mladen Pozajić»

Podjela školskog pribora za 300 učenika

U prostorijama Općine Stari Grad 28. avgust 2009. godine izvršena je podjela školskog pribora za 300 učenika. Pakete su dobila sva djeca iz šehidskih porodica, a ostatak je raspoređen na boračka udruženja koja su pakete podijelili porodicama sa dvoje i više djece, te onima lošeg imovinskog stanja. Ukupno je podijeljeno 140 paketa školskog pribora učenicima osnovnih, a 160 paketa učenicima srednjih škola. Za ovaj projekat Općina Stari Grad je iz budžeta izdvojila 10.000 KM. Podjeli su prisustvovati korisnici paketa, načelnik Općine Stari Grad Ibrahim Hadžibajrić, pomoćnik načelnika za boračko-invalidsku, socijalno-zdravstvenu zaštitu, raseljena i izbjegla lica Alija Kamber i predsjednici udruženja boračkih populacija sa Starog Grada.

Pomoćnik načelnika Alija Kamber istakao je da je osnovni kriterij pri odabiru učenika koji su dobili pakete školskog pribora bio materijalno stanje i socijalni status porodice.

Načelnik Hadžibajrić je istakao da Općina Stari Grad svake godine iz budžeta izdvaja određena sredstva za ove namjene, a ubuduće će se nastojati da ta sredstva budu i veća s obzirom na ugroženost ove kategorije stanovništva.



Dogradnja Osnovne škole "Vrhbosna"

Da bi osnovna škola „Vrhbosna“ na području Mjesne zajednice „Mošćanica“ bila u potpunoj funkciji, neophodno je izgraditi i dio objekta koji je srušen u toku rata. Naime, Općina Stari Grad Sarajevo izdala je urbanističku dozvolu i izradila potrebnu projektnu dokumentaciju. Projekat se izvodi po savremenim građevinskim i pedagoškim standardima i normativima. Radnici građevinske firme „AL INŽINJERING“ d.o.o. Sarajevo u septembru ove godine pristupili su realizaciji projekta. Radi se o bloku uz postojeću školu, koji će biti urađen na dvije etaže,

koje su predviđene za nove učionice i kabinete. Nakon završenog projekta škola će biti opremljena u punom kapacitetu. Realizaciju ovog projekta u vrijednosti od 85.000 KM finansira Federalno ministarstvo obrazovanja i Općina Stari Grad Sarajevo.

Dodajemo, škola ima otvoreno igralište sa dvorištem, sportsku salu, prostorni kompleks zemljišta na kojem se nalazi mladi zasad voćnjaka kao i plastična proizvodnja povrća, tako da će škola nakon kompletiranja sa novim učionicama na starim temeljima biti jedinstvena škola u Kantonu Sarajevo, ali i šire.



Revitalizacija općinskih prostorija

U poredo s rješavanjem gorućih pitanja na terenu, poput izgradnje potpornih konstrukcija, kanalizacionih mreža, mostova, asfaltiranja ulica, izgradnje spomen obilježja i dr., pristupa se i sanaciji i revitalizaciji samih općinskih prostorija. Važno je istaći da se u prethodnom periodu jako malo pažnje poklanjalo ovom pitanju te su se u većini slučajeva izdvajala simbolična sredstva za hitne sanacije i tzv. krpljenja. Ipak u zadnje vrijeme više se radi na tom planu: u potpunosti je revitalizirana šalter sala i prijemni hol, saniran enterijer velike sale i aule (objekat "C"),

urađen novi vodovodni šaht ispred glavnog ulaza kao i mnogi drugi sitniji radovi.

Ipak, značajnija ulaganja u visini od 35.000 KM izdvojena su za sanaciju 750 m² krovne površine velike sale. Tridesetak godina je proteklo od ulaganja u ovaj dio zgrade, a sve veće prokišnjavanje intenziviralo je aktivnosti na planu njegove zaštite. U prvoj fazi sanirani su propusni otvori, a u drugoj (koja je u toku) stavlja se zaštitni hidroizolacioni sloj. Izvođač radova je Elmax Inžinjering d.o.o Saraj.



Najveći sarajevski park, Trebević, je deminiran

U septembru ove godine završen je proces deminiranja Trebevića koji je počeo još davne 1997. godine. Ukupna deminirana površina iznosi 1.137.181,55 m². U finansiranju ovog projekta učestvovali su Grad Sarajevo, Kanton Sarajevo i Općina Stari Grad Sarajevo. Ne smijemo zaboraviti i one koji su izvodili radove na humanitarnoj osnovi kao što su: INTERSOS Italija, NPA – Norveška narodna pomoć, kao i druge međunarodne humanitarne

organizacije koje su obezbijedile sredstva putem ITF-a Sarajevo. U procesu deminiranja Trebevića učestvovali su i slijedeće firme: Stop mines-Pale, Pro vita-Mostar, Uem-Sarajevo, Zom-Bihać, Uxb Balkan-Sarajevo, Demira-Sarajevo, Tehnoelektro-Bosanski Brod, Mechem Countermining. Nakon deminiranja Curinih njiva, Pitinih stijena i Vidikovaca, Trebević će, kao nekad, postati najomiljenije i najpristupačnije sarajevsko izletišta.

Nije se čekalo sa pošumljavanjem Trebevića

Čim su se stvorili uslovi, nakon deminiranja Čogoljenih padina Trebevića, Općina Stari Grad je pristupila dugoročnom projektu pošumljavanja pluća Sarajeva. U februaru 2009. godine Općina Stari Grad inicirala je izradu i realizaciju projekta šumsko uzgojnih radova na području Općine koji se proteže od naselja Boguševac, Bistrik potokom 200 metara, a zatim uz greben do Bistrik kule, granicom prema Velikoj Čolinoj Kapi, te granicom privatnog posjeda do Male Čoline Kape, iznad Pogledina i Mahmutovca do naselja Boguševac. Trebević predstavlja izuzetno značajan lokalitet nadomak Grada sa značajnim prirodnim vrijednostima. Od davnina se čovjek trudio uzgojiti, njegovati i održati ambijent visoke šume nadomak urbanog centra, koji je dostupan građanima za kojih desetak minuta pješaćenja. Shvativši takvu ulogu ovog prostora, opredjeljenje stručnjaka šumarstva je bilo da se, od sredine prošlog vijeka, gazduje Trebevićem kao vanprivrednim područjem, tako da se u prvi plan stavljaju njegove vrijednosti koje se ne ogledaju u proizvodnim, već u općekorisnim funkcijama šume. Općekorisne funkcije šume podrazumijevaju funkciju očuvanja i zaštite okoliša (zaštitu zraka, vode, zemljišta, divljači, uticaj na klimu i sl.) i rekreaciono-zdravstvenu funkciju. Utvrđivanje vrijednosti ovih funkcija šume je teško iskazati finansijski, ali je činjenica da njihova vrijednost raste sa nestajanjem šuma i šteta u životnoj sredini. Do 1992. godine ovaj prostor je bio pokriven visokom šumom četinara. Do 1995. godine površina navedenog odsjeka je ogoljena sječom svih stabala na površini

od 29,50 ha. Pojedinačna stabla koja su preostala na tom lokalitetu u takvoj su mjeri fizički oštećena da nisu mogla preživjeti. Tako je na dijelu površine koji gravitira Gradu, Općina Stari Grad u saradnji sa KJP «Sarajevo-šume» d.o.o. Sarajevo, odlučila uložiti sredstva za realizaciju Projekta. Projekat podrazumijeva čišćenje terena od nepoželjne vegetacije, čime se uklanjaju konkurentne vrste drveća, grmlja i potencira rast poželjnih vrsta drveća. Realizacija Projekta se završava sadnjom 5000 komada trogodišnjih i



dvogodišnjih sadnica smrče i bijelog bora, na pažljivo odabranim mikrolokacijama, uvažavajući optimalan prostorni raspored. Sve aktivnosti se poduzimaju za stvaranjem bogate šumske biocenoze koja će doprinijeti da se Trebeviću vrati bar dio nekadašnjeg izgleda. S obzirom da je uzgoj šume dug i zahtjevan posao, možemo biti ponosni što budućim generacijama ostavljamo bogatstvo prirode.

Obnova ograde Carevog mosta

Još jedan projekat koji će Općina Stari Grad realizovati u narednom periodu jeste potpuna zamjena ograde na Carevom mostu. Planira se zamjena stare dotrajale ograde i postavljenje nove od kovanog

željeza. Objavljujemo sliku Carevog mosta danas i fotografiju iz arhive koja datira iz austro-ugarskog perioda, a koja pokazuje kako bi ograda trebala izgledati i u budućnosti.



Prva međunarodna biciklistička trka Das ist Valter 2009 – Downtown Sarajevo

Na području Općine Stari Grad 16. avgusta 2009. godine održana je prva međunarodna biciklistička trka "Das ist Valter 2009 – Downtown Sarajevo". Takmičari iz sedam zemalja, njih 66, priredili su građanima Sarajeva nesvakidašnju sportsku atrakciju. Riječ je o urbanoj varijanti discipline downhill (spust), koja se vozila po sitnom makadamu, asfaltu, kaldrmi, stepenicama i preko sličnih prepreka. Start trke bio je na Zmajevcu, a dalje su takmičari vozili kroz vratničke mahale, pored Kovača, sve do Vijećnice. Titulu "Das ist Valter 2009" osvojio je Boštjan Volf iz Slovenije čime je postao prvi pobjednik međunarodne biciklističke trke "Das ist Valter

2009 – Downtown Sarajevo". Stazom od Zmajevca, kroz vratničke mahale, preko Kovača do Vijećnice spustio se u vremenu od 2:57:444.

Saša Merljak (3:05:301) iz Slovenije, te Dejan Mamuzić (3:09:322) iz Hrvatske osvojili su drugo, odnosno treće mjesto. U ovoj ekstremnoj biciklističkoj disciplini takmičilo se 66 vozača iz 7 zemalja. Najbolji predstavnik Bosne i Hercegovine bio je Hasan Gušić (3:15:220) koji je zauzeo šesto mjesto.

Organizator NVO "Horizont" osigurao je nagradni fond od 1800€. Prvoplasirani Volf osvojio je i novčanu nagradu od 1000€, dok su drugoplasirani i trećeplasirani osvojili 500 odnosno 300€.

Organizatori su se zahvalili načelniku Općine Ibrahimu Hadžibajriću koji je prepoznao značaj ove manifestacije i pomogao u njenoj realizaciji, kao i stanovnicima pored čijih kućnih vrata se odvijao ovaj jedinstveni sportski događaj na podršci i razumijevanju.

Na Trgu oslobođenja – Alija Izetbegović održani Summer Book Fest i Ljetna književna pozornica

Na Trgu oslobođenja – Alija Izetbegović održan je Summer Book Fest i Ljetna književna pozornica čiji je suorganizator bila Općina Stari Grad. Ovaj Ljetni festival knjige organizovali su IKD University

Press d.o.o i Biblioteka Sarajeva, uz učešće TKD Šahinpašić. Na ovogodišnjem Festu učestvovalo je 26 izdavača iz BiH i regije, a postavljeno je ukupno 29 štandova sa Info pultom, Dječijom radionicom i Ljetnom književnom pozornicom. Specijalni gost Festa bio je poznati iranski pisac Kader Abdolah koji je predstavio svoj čuveni roman "Kuća imama. Osim toga, organizovani su i posebni dnevni programi posvećeni najmlađim, kao što je Milkina dječija pozornica, promocije slikovnica i časopisa za djecu, likovne i pjesničke radionice, te mala scena Dječije čitaonice "Bubamara".

Održan Sedmi međunarodni sajam pčelarstva i pčelarske opreme "Bee-fest"

Sedmi međunarodni sajam pčelarstva i pčelarske opreme "Bee-fest" održan je od 02. do 06. septembra na Trgu oslobođenja - Alija Izetbegović u Sarajevu. Na Sajmu su učestvovali izlagači iz svih krajeva Bosne i Hercegovine, kao i iz Srbije, Crne Gore i Hrvatske. Ovim je potvrđena reputacija Bee-festa kao najvećeg godišnjeg regionalnog skupa pčelara. Također, na Sajmu su predstavljeni najkvalitetniji pčelinji proizvodi, preparati na bazi pčelinjih proizvoda i ljekovitog bilja, kao i literatura i oprema za pčelarstvo. Organizatori su i ove godine dodijelili tradicionalne zlatne, srebrene i bronzane medalje u više kategorija za najkvalitetniji med i druge pčelinje

proizvode, kao i originalnu titulu „Med medova“, a dodijeljeno je i posebno priznanje za doprinos razvoju pčelarstva u BiH.



Virtual tour 360° - novost na općinskoj web stranici

Virtual tour 360° odnosno tehnika virtualnog prikaza značajnih lokacija (u ovom slučaju Općine Stari Grad - trgova, ulica, objekata...) je nešto što je novo na ovim prostorima i što je izazvalo veliku pažnju posjetitelja općinske web stranice (www.stari-grad.ba). Prvi put ova Općina omogućava svim zainteresovanim građanima, ali i strancima, turistima, te zaljubljenicima u naše kulturno-historijsko nasljeđe kojim Stari Grad obiluje, tzv. virtuelnu šetnju i obila-

zak najznačajnijih kulturnih i vjerskih objekata. Sjedeći u svom udobnom domu, ili na poslu, u uredu, jednostavnom konekcijom na općinsku web stranicu možete prošetati Baščaršijom ili zaviriti u Katedralu na primjer...

Putem Virtual toura do sada su se mogle pogledati fotografije harema Begove džamije (ogradaeni dvorišni prostor) i Baščaršije. Novih deset fotografija oslikavaju širi prostor Baščaršije kao i vjerske objekte locirane na našoj Općini u radijusu od svega 100 metara: Stara pravoslavna crkva na Baščaršiji, Katedrala Srca Isusova-Sarajevska katedrala, Stari jevrejski hram i Begova džamija...

Asfaltiraje i saniranje ulica na području Općine Stari Grad Sarajevo

Komunalni odsjek Općine Stari Grad u saradnji sa predstavnicima Kantonalnog javnog komunalnog preduzeća „Rad“ izvršili su snimanje stanja saobraćajnica na području Općine Stari Grad. Urađeni su orijentacioni predmjeri i predračuni potrebnih radova na sanaciji udarnih rupa i presvlačenja ulica. Nakon potrebnih priprema već u julu mjesecu ove godine uslijedila je realizacija na terenu. Pojedine

ulice su kompletno urađene, uklonjen je stari asfalt, izvršeno nivelisanje šahtova i rešetki za odvod oborinskih voda, postavljena je nova tamponska podloga, a nakon toga asfaltirana saobraćajnica. U isto vrijeme, uporedo se radilo na više lokacija na saniranju udarnih rupa. Sanirane su sljedeće ulice: Bostarići, Toromanova, Kečina, Put Barice-Čavljak, Pod bedmom, Safveta-bega Bašagića (dio od Auto servisa do kraja ulice), Džanin sokak, Josipa Šadlera, Sedrenik do broja 57, Logavina, Potoklinica, Brajkovac, spoj ulica Boguševac Bostarići i Čemerlina. Realizaciju ovog projekta u vrijednosti od 204.129,28 KM finansira Općina Strari Grad Sarajevo.

Rekonstrukcija i asfaltiranje ulica Bajramuša i Obhodža

Na osnovu ovogodišnjeg sporazuma i potpisivanja Anexa ugovora između Općine Stari Grad, Direkcije za puteve Kantona Sarajevo i Kantonalnog javnog komunalnog preduzeća „Rad“, tokom avgusta urađena je rekonstrukcija ulica Bajramuša i Obhodža. Radove je finansirala Općina Stari grad sa 62.000 KM.

Zbog velikog oštećenja saobraćajnice, odlučeno je da se izvrši rekonstrukcija 350 metara ulice Bajramuša. Uklonjen je stari sloj asfalta sa podlogom, postavljena je nova tamponska podloga, izvršeno nivelisanje šahtova i rešetki za odvod oborinskih voda. Potom je uslijedilo asfaltranje.

Uporedo se radilo i na rekonstrukciji ulice u Mjesnoj zajednici „Moščanica“, te su sredinom avgusta ove godine radnici firme Kantonalnog javnog komunalnog preduzeća „Rad“ završili projekat asfaltiranja ulice Obhodža. Stanovnici tog dijela Općine Stari Grad neće više prolaziti makadamskom cestom do

svojih domova. Asfaltiranju ove ulice predhodilo je proširenje, sipanje tampona, te postavljene šahtova i rešetki za odvod oborinskih voda. Poslije urađenih navedenih radova, uslijedilo je asfaltiranje cjelokupne saobraćajnice i platoa ispred džamije Obhodža.



BAJRAMUŠA

Završeni radovi na rekonstrukciji kanalizacione mreže na lokalitetu Bentbaša-Podcarina

Jedan od najvećih projekata Općine Stari Grad Sarajevo „Rekonstrukcija kanalizacione mreže na lokalitetu Bentbaša-Podcarina“ završen je 07. septembra 2009. godine. Naime, prva faza rekonstrukcije kanalizacione mreže počela je u julu 2008. godine, nakon potpisivanja Anexa ugovora. Tada je urađena dionica od Bentbaše do Aleje ambasadora u dužini od 288 metara, nakon čega je izvršeno asfaltiranje ulice. Druga faza krenula je 15. jula 2009. go-

dine. Tada je postavljena nova kanalizaciona mreža na dionici od pumpe do Podcarine preko mosta u dužini od 234 metra. Ugovoreni rok za završetak radova je ispoštovan, a radove je izvodila građevinska firma „Mibral“ d.o.o. Izgradnjom kanalizacione mreže u ovom dijelu Starog Grada otpadne fekalije sa lijeve obale Miljacke odvođe se u centralni kolektor tj. prečištač, čime stanovnici tog dijela mjesne zajednice „Bašaršija“ konačno rješavaju ovo važno pitanje. Investitor projekata je Ministarstvo prostornog uređenja i zaštite okoliša Kantona Sarajevo, a realizator Općina Stari Grad Sarajevo. Visina uloženi sredstava iznosi 397.849,07 KM.



DIONICA OD BENTBAŠE DO ALEJE AMBASADORA

Izgradnja potpornih konstrukcija

Zbog nastalih klizišta i naglih obrušavanja pristupilo se hitnoj sanaciji, te izgradnji dva nova armirano-betonska potporna zida. Izgradnjom tih potpornih zidova riješeni su veliki problemi građana ulice Begovac Mjesne zajednice "Mahmutovac". I pored velikog nagiba ulice i malog razmaka između objekata radnici građevinske firme "Neimari" d.o.o. Sarajevo uspješno su završili izgradnju. Radovi u ulici Begovac 32-34 su počeli 15. jula 2009. godine, a završeni 03. avgusta 2009. godine. Općina Stari Grad za ovaj projekat izdvojila je 19.512,75KM.

Nakon toga, s ciljem povećanja stabilnosti okolnog tla, sredinom avgusta 2009. godine radnici građevinske firme "Neimari" d.o.o. Sarajevo nastavili su sa izgradnjom drugog potpornog zida na broju 70-72. Izgrađeno je 26,5 metara zida. Nakon urađenog uslijedila je gradnja još 12 metara obložnog potpornog zida i 12 metara armirano-betonske grede. Realizaciju ovog projekta u vrijednosti od 35.563,50KM, također, finansirala je Općina Stari Grad Sarajevo. Zbog naglog i ubrzanog pokretanja klizišta pristupilo



ZID U ULICI BEGOVAC BR. 32-34

se hitnoj sanaciji i izgradnji još jednog potpornog zida na lokaciji Močila broj 25. Naime, tokom septembra mjeseca ove godine urađen je 10 metara dug armirano-betonski potporni zid sa dva kontrafora (betonski podupirači). Realizaciju ovog projekta u vrijednosti cca 15.000 KM finansirala je Općina Stari Grad Sarajevo, a izvođač radova bila je građevinska firma "Neimari" d.o.o. Sarajevo.

Sanacija i asfaltiranje ulica Sagrdžije, Safveta bega Bašagića i Širokača



ULICA SAGRĐIJE

Na osnovu ovogodišnjeg sporazuma između Općine Stari Grad i Direkcije za ceste Kantona Sarajevo koja je realizator projekta, radnici Kantonalnog javnog komunalnog preduzeća „Rad“ su 02. septembra 2009. godine počeli sa radovima u ulicama Sagrdžije dužine 84 metra, Safveta bega Bašagića dužine 106 metara i Širokače dužine 93 metra. Zbog velikog oštećenja saobraćajnica odlučeno je da se izvrši kompletna rekonstrukcija tih dijelova. Trenutno je uklonjen stari asfalt i radi se na ivičnjacima, nakon čega će se postaviti nova tamponska podloga, izvršiti nivelacija šahtova i rešetki za odvod oborinskih voda. Realizaciju ovog projekta u vrijednosti od 126.361,66 KM. finansira Kanton Sarajevo i Općina Stari Grad Sarajevo.

Obnova romskog naselja Moščanica



Općina Stari Grad Sarajevo je početkom septembra mjeseca ove godine pristupila realizaciji projekta obnove romskih baraka u naselju Moščanica. Gradi se jedan prizemni objekat za šest romskih porodica, koji će ubrzo imati riješeno stambeno pitanje. Projekat će se raditi u dvije faze. Prva faza podrazumijeva izvođenje grubih građevinskih radova, postavljanja krovne konstrukcije, vrata, prozora i dr. Nakon toga, pristupit će se realizaciji druge faze koja podrazumijeva uvođenje kanalizacije, te priključke vode i struje. Realizaciju ovog projekta finansira Kanton Sarajevo i Općina Stari Grad Sarajevo.

Hitna sanacija krova i krovne konstrukcije Gazi Husrev-begovog bezistana

Služba za komunalne poslove i investicije Općine Stari Grad uputila je dopis Kantonalnom zavodu za kulturno-historijsko i prirodno naslijeđe u vezi rješenja problema nastalog zbog ugroženosti bakarnog pokrova Bezistana, usljed nelegalnog postavljanja klima uređaja. Zbog bespravnog postavljanja klima uređaja od strane nekoliko korisnika poslovnih prostora Zavod je namjeravao da odustane od počete hitne sanacije zato što nisu predviđena finansijska sredstva za rješavanje problema klima uređaja koji štetno djeluju na pokrov, a Bezistan je nacionalni spomenik prve kategorije. Podsjećamo, Kantonalni zavod za zaštitu kulturno-historijskog i prirodnog naslijeđa je izradio Projekat i poduzeo adekvatne mjere na zaštiti, u ovom slučaju, Gazi Husrev-begovog bezistana. Zavod je dobio saglasnost Federalnog zavoda za kulturno-historijsko i prirodno naslijeđe, raspisao tender i odabrao najpovoljnijeg izvođača firmu «UNIGRADNJA», koja je započela radove na



Bezistanu. Bakarni pokrov nije mogao da se postavlja u kontinuitetu zbog klima uređaja. Zavod se obratio Federalnom zavodu za zaštitu kulturno-historijskog i prirodnog naslijeđa i Federalnoj inspekciji radi nalaženja rješenja, a nastavio je postavljanje pokrova preskačući one dijelove krova gdje se nalaze klima uređaji. Ovaj projekat preko Zavoda finansira Kanton Sarajevo, a sufinansiraju Gradska uprava Grada Sarajeva, Vakufska direkcija i Općina Stari Grad.

Sistem kontrole pristupa na područjima ograničenog prometa Općine Stari Grad Sarajevo pomoću potopnih stubića



Općina Stari Grad Sarajevo je pristupila realizaciji projekta sistema kontrole pristupa na područjima ograničenog prometa Općine Stari Grad pomoću potopnih stubića. Cilj projekta je ograničenje prometa vozila na području Općine Stari Grad u svrhu očuvanja i zaštite kulturno-historijskog jezgra Bašćaršije. Uz pomoć savremenih tehnologija vršit će se kontrola saobraćaja na lokalitetu Bašćaršija u zoni ograničenoj ulicama Telali, Brodac, Obala Kulina bana, Zelenih beretki, Kantardžića, Gajev Trg, te Mula Mustafe Bašeskije. S obzirom da se radi o poslovno-trgovačko-turističkoj zoni, veliki je broj uglavnom dostavnih vozila koji ugrožavaju unutrašnju pješачku zonu. Stoga je potreban sistem koji će urediti mogućnost ulaska za ograničeni broj motornih vozila u određenom periodu dana, a da ne predstavljaju prepreku za vozila vatrogasne i službe hitne pomoći. Pošto se radi o historijskom lokal-

itetu, elementi sistema moraju što manje da utiču na opći izgled lokaliteta. Zbog toga su potopni stubići optimalno rješenje, sa neophodnom opremom za zaštitu, signalizaciju i komunikaciju sa nadzornim centrom. Nadzorni centar je opremljen SCADA sistemom (sistem za nadzor i upravljanje), odakle je moguće identificirati ovlaštenu osobu/vozilo koja je unutar zaštićene zone, pratiti njene ulaske i izlaske, kao i daljinski omogućiti ili onemogućiti dalje kretanje u zaštićenoj zoni. Projekat će se realizirati u dvije faze. U prvoj fazi predviđene su sljedeće ulice: Bravadžiluk, Abadžiluk, Bazardžani, Aščiluk, Muvekića i Prote Bakovića. Radnici firme MIBO Komunikacije d.o.o. Sarajevo krajem avgusta ove godine počeli su sa radovima i završili ulice Bazardžani, Aščiluk i Prote Bakovića. Realizaciju ovog projekta finansira Kanton Sarajevo i Općina Strari Grad Sarajevo. Ukupna vrijednost prve faze iznosi 330.846,75 KM.

Vožnja fijakerima kroz Aleju ambasadora

Udruženje ratnih vojnih invalida Stari Grad u saradnji sa Općinom Stari Grad od mjeseca juna zvanično je počelo sa pružanjem nove usluge, koja će pospješiti i obogatiti turističku ponudu Općine i Sarajeva. Riječ je o vožnji fijakerima kroz Aleju ambasadora.

Alejom ambasadora građani i turisti će imati priliku da se voze kočijama i porodičnim biciklima na relaciji Bentbaša, Dariva i Kozija ćuprija. «Na ovom projektu radit će ratni vojni invalidi, a trenutno za sada su na raspolaganju dva fijakera i četiri porodična bicikla. Svi zainteresovani se mogu voziti radnim danom od 12:00 do 20:00 sati, a vikendom od 10:00 do 20:00 sati. Vožnja od Bentbaše do Darive košta 5 KM, a do Kozije ćuprije 10 KM. Kako je istakao Ekrem Kaljavac, predsjednik Udruženja RVI Stari Grad, u Aleji će se nalaziti tri punkta, gdje će posjetioци moći kupiti osvježavajuća bezalkoholna pića. "Općina je izašla u



susret Udruženju, te smo zajedno pokrenuli projekat. Na ovaj način poboljšat ćemo turističku ponudu i omogućiti stanovnicima Starog Grada i Sarajeva novu atrakciju." rekao je načelnik Ibrahim Hadžibajrić.

Poribljavanje rijeke Miljacke i Mošćanice

Poribljavanje rijeke Miljacke i Mošćanice izvršeno je 20. avgusta 2009. godine. Sportsko ribolovno društvo "Sarajevo 1906" i sekcija Stari Grad pustili su 268 kg potočne pastrmke od 14 do 18 cm. Općina Stari Grad već tradicionalno vrši poribljavanje rijeke. Radi se o kvalitetnim vrstama koja će se nakon

određenog vremenskog perioda sigurno prilagoditi novoj sredini. Cilj ovog projekta je podsticanje prirasta i smanjenje godišnje eksploatacije ihtioresursa u ribolovnim vodama Kantona Sarajevo, čuvanje i unapređenje ribljeg fonda, smanjivanje štetočina, uređivanje i održavanje ribolovnih područja, da radni čovjek kroz rekreaciju, relaksaciju i sport lakše izdrži pritisak i tempo savremenog vremena, te da se omladina da se educira i uspješno bori za očuvanje čovjekove okoline i prirode bez koje čovjek ne može opstati.

Turske delegacije posjetile Općinu Stari Grad



DELEGACIJA IZ BURSE

U protekla dva mjeseca Općinu Stari Grad posjetile su dvije izuzetno ugledne delegacije iz Republike Turske. Načelnik Ibrahim Hadžibajrić i predsjedavajući Općinskog vijeća Rizah Avdić sa svojim saradnicima primili su 29. juna 2009. godine u prostorijama Općine delegaciju Burse: gradonačelnika Burse Redžepa Al-tepea (Recep Altepi), načelnika Općine Osman Gazi - Bursa Mustafu Dundara (Mustafa Dundar) i člana državne Komisije za kulturna i sociološka pitanja Gi-jasetina Bingola (Giyasettin Bngöli) sa njihovim pratiocima. Obavljeni su preliminarni razgovori o realiza-

ciji projekata obnove Bakr-babine džamije i ćuprije Isa-bega Ishakovića (Careva ćuprija). Tokom sastanka razmijenila su se mišljenja o mogućnostima dvaju strana na realizaciji ova dva porušena objekta iz osmanskog. Nedugo nakon te posjete, Općinu je svojim dolaskom počastvovala delegacija Republike Turske na čelu sa Erdžanom Uslu (Ercan Uslu), ministrom za kulturu i civilne poslove grada Konje (Konya) i Hakanom Tutundži (Hakan Tütüncü) načelnikom Općine Kepez grada Antalije (Antalya) koji su stigli 14. jula 2009. godine Tom prilikom načelnik Ibrahim Hadžibajrić i njegov savjetnik Ismet Hadžić sa gostima su vodili intenzivne razgovore iz oblasti kulture, turizma itd.



DELEGACIJA IZ KONJE I ANTALIJE

Iftari u Općini Stari Grad

Ramazan je mjesec posta i odricanja, ali isto tako i mjesec radosti, oprost i milosti. Svaki pravi vjernik dužan je podijeliti radost ramazana sa drugima, ali isto tako i pružiti pomoć onome kome je potrebna. Vođeni tom idejom dobri ljudi sa načelnikom Općine Stari Grad Ibrahimom Hadžibajrićem odlučili su upriličiti iftare za stanovnike Općine Stari Grad. Svake noći u holu velike sale Općine organizovani su iftari za 100-120 postača, a kako je istakao načelnik Hadžibajrić vrata Općine su bila otvorena za svakoga i niko nikada nije vraćen sa iftara. U dogovoru sa sekretarima 16 mjesnih zajednica sa

područja Općine, zainteresovanim građanima podijeljene su kartice sa kojima su dolazili svake noći na iftar, a sa njima se iftarili i 10 učenika Gazihusrefbegove medrese. Ovim postačima na jednom od iftara pridružio se i sam načelnik Hadžibajrić, koji nije krio zadovoljstvo zbog činjenice da je sala i te noći, kao i svake prethodne noći Ramazana bila puna, a postači su uživali u hrani vrhunskog kvaliteta. Ranijih godina u Općini Stari Grad nije bilo organizovanih iftara, a već sada se zna da će ova akcija postane tradicionalna.



Bajramske aktivnosti u Općini Stari Grad

Povodom najvećeg islamskog praznika, ramazanskog Bajrama, Općina Stari Grad organizovala je bajramsko druženje za sve vjernike i građane koji su željeli podijeliti radost Bajrama i družiti se uz bajramske poslastice i druga posluženja. Uz pomoć dobrih ljudi, Općina je u auli velike sale Općine Stari Grad organizovala druženje na prvi dan Bajrama, u nedjelju 20.septembra od 09-12:00 sati. Nakon obavljenog bajram-namaza u salu su počeli pristizati građani koji su bili posluženi kafom, sokovima i kolačima. Bila je to prilika za razmjenjivanje čestitki, prijatne razgovore i uživanje u tradicionalnim poslasticama po kojima je prepoznatljiv Stari Grad.

Općina je tokom mjeseca Ramazana, uz pomoć dobrih ljudi, svake večeri organizovala iftare za vjernike postače kojih je iz noći u noć bilo sve više i svako od njih je iftario u duhu Ramazana. Bajramsko druženje u Općini bilo je kruna ove uspješne akcije koja će postati tradicionalna i nastaviće se svakog sljedećeg Ramazana.

„Općina je uz pomoć dobrih ljudi svake večeri organizovala iftare za postače slabijeg materijalnog stanja. Iz noći u noć na iftare je dolazilo sve više i više postača. Ukupno ih je bilo više od 4 000, a za noć i do 200. Svi oni su pozvani na bajramsko druženje da porazgovaramo i podijelimo ljepotu praznika,“ izjavio je načelnik Ibrahim Hadžibajrić.

Drugi dan Ramazanskog Bajrama obilježava se kao Dan šehida. Tim povodom, delegacija Općine Stari Grad u sastavu načelnik Općine Ibrahim Hadžibajrić,

predsjedavajući Općinskog vijeća Rizah Avdić, savjetnik načelnika Ismet Hadžić i pomoćnik načelnika za boračko-invalidsku, socijalnu i zdravstvenu zaštitu, izbjegla i raseljena lica Alija Kamber posjetili su Šehidsko mezarje Kovači i položili cvijeće. Tom prilikom je proučena Fatiha svim šehidima, kao i na mezaru Alije Izetbegovića, prvog predsjednika Bosne i Hercegovine.



Predstavljamo Vam: Mjesnu zajednicu "Bistrik"

Savjet mjesne zajednice:

1. Haris Hondo - predsjednik
2. Marijana Škoro - član
3. Vedran Jasmin Mehičević - član
4. Mehičević Dodik Ajša - član
5. Trifković Branko - član
6. Amela Jažić - član
7. Zvirac Zineta - član

Sjedište mjesne zajednice:

Ulica Bakarevića br. 7, Tel: 336-493
Sekretar MZ: Senida Š. Fočo
e-mail: mz.bistrik@starigrad.ba



Mjesna zajednica Bistrik se nalazi na lijevoj obali Miljacke. Svojom geografskim položajem zauzima važno mjesto u saobraćajnoj komunikaciji sa padinskim djelovima Starog Grada, kao i sa gradskom zaobilaznicom. Zauzima prostor od obale Miljacke: Latinske i Careve čuprije, Obala Isa-bega Ishakovića, pa do gradske zaobilaznice Put Mladih Muslimana. Na području Mjesne zajednice "Bistrik" ima 29 ulica i jedan trg, živi cca 5020 stanovnika, a na njenoj teritoriji su brojne mahale koje su bogate kulturno-historijskim spomenicima.

Nabrojat ćemo neke znamenitosti:

- Careva džamija je podignuta 1457. godine sredstvima Isa-bega Ishakovića. U sastavu džamije je zgrada Uleme-medžlisa kao i vrijedni nadgrobnici spomenici (nišani) koji se nalaze u haremu džamije.
- Čokadži Hadži Sulejmanova džamija – Jedilerska ili Sedam braće, izgrađena je 1539. godine.
- Džamija Gazi Mehmed-bega Ishakovića (sina Isa-bega Ishakovića) ili džamija Bistrik medresa, sagrađena 1526. godine.
- Džamija Kečedži hadži Sinanova u Bakarevićevoj ulici sagrađena je u XVI stoljeću. Za ovu džamiju su vezane mnoge legende oko njene izgradnje i njenog vakifa.
- Džamija Hadži Mehmed Ivakovli u ulici Hrvatinića sagrađena je 1558. godine.
- Franjevački samostan sagrađen 1894. godine i crkva sv. Ante Padovanskog sagrađena 1914. godine, zajedno čine vrijednu graditeljsku cjelinu.
- Isa-begov hamam, javno kupatilo, spominje se prvi put 1462. godine. Srušeno je 1889. godine, a ponovo sagrađeno u novom maniru 1891. godine po projektu Josipa Vancaša.
- Stara željeznička stanica, na Bistriku, sagrađena je početkom XX stoljeća kao prateći objekat uskotračne pruge Sarajevo - Višegrad.
- Rezidencija Konak, sagrađen za vrijeme vlade Topal Šerif Osman paše 1869. godine. Objekat je sagrađen u neobaroknom stilu i ugostio je članove porodice Hapsburg (cara Franju Josipa, prijestolonasljednika Franca Ferdinanda i njegovu suprugu Sofiju).



Hodidjed i Bijela tabija

(654 m nadmorske visine 43° 51' 32.59 "s.g.š., 18° 26' 40.72" i.g.d. i udaljena 1,08 km vazdušne linije od Sebilja)

U gradu u Zlatnoj dolini malo je toga o čemu možemo govoriti tako da nema ni u čemu nikakve sumnje i gdje je sve kristalno jasno. Upravo tako je i sa Bijelom tabijom (tabija < ar. isturena kamena utvrda odakle pucaju topovi) koja već stoljećima stameno stoji ponad Vratnika. Kad je sagrađena Bijela tabija, odnosno, je li prije nje bila utvrda i kakvog je tipa bila pitanja su na koja i danas brojni istraživači daju različite odgovore. U ovom kazivanju pokušat ćemo dati kratki osvrt na Bijelu tabiju, ali i stari grad Hodidjed koji se dovodi u vezu s Bijelom tabijom.

XV stoljeće za prostor grada Sarajeva, ali i cijelu BiH je vrijeme prekretnice, smjene vlasti, ali i načina života općenito. Ta velika smjena ne znači i potpuni diskontinuitet u kulturi, urbanizmu itd. Naprotiv, svugdje tamo gdje je nova vlast, nova kultura, mogla nesmetano nastaviti svoje bivstvovanje na temeljima zatečene kulture - to se je i desilo. Dobar primjer za to su srednjovjekovni bosanski gradovi, koje Osmanlije koriste i nastavljaju njihov razvoj u novom ruhu. Postojeći gradovi poprimaju islamsko-orijentalnu fizionomiju, te se na taj način osigurava izvjestan kontinuitet u urbanizmu. Tako je i sa srednjovjekovnim naseljem na području današnjeg Sarajeva. S dolaskom Osmanlija to se naselje oblikuje u osmansku kasabu, i tako izravno imamo kontinuitet naselja iz bosanskog srednjovjekovlja. Taj kontinuitet je prisutan i u toponomastici koja se zadržala u gradu, koja jasno sugeriše da se ovdje i prije Osmanlija život dobro odvijao. Obratimo li pažnju na sarajevske toponime uvidjet ćemo brojne srednjovjekovne nazive: Brodac, Hrvatini, Komatin, Bistrik, Hrid... Sve ovo jasno kazuje da Osmanlije nisu došle na ledinu i s ledine započeli razvoj onog što se danas zove Sarajevo.

Današnje Sarajevo je smješteno na prostoru nekadašnje bosanske srednjovjekovne župe Vrhbosne. Centar te župe je bio grad Hodidjed. Ubikacija tog grada do danas je različita i mišljena su podjeljena u dva suda. Jedni smatraju da se taj grad (utvrda sa podgrađem) nalazio u Bulozima, a drugi ga smještaju na prostor današnje Bijele tabije. Treba istaći da je mjesto na kome je Bijela tabija daleko povoljnije u strateškom smislu, jer pogled s Bijele tabije se pruža niz dolinu rijeke Miljacke, a i seže na istok sve do Buloga i dalje. Druga prednost ove lokacije je ta što se ona nalazi na trasi glavnog puta (Bioski put). Sve ove prednosti lokacije Bijele tabije ukazuju da je Hodidjed bio na mjestu današnje Bijele tabije, a ne na mjestu starog grada u Bulozima, jer sama ta lokacija je dosta zavučena i nije vezana ni za jedan put. Također, treba istaći da Bijela tabija, odnosno, onomad Hodidjed, ima, za razliku od starog grada u Bulozima, pogodniji prostor za razvoj podgrađa. Ovo su neki od argumenata koje ističu autori, kao Alija Bejtić, kada govore o Hodidjedu kao gradu na mjestu današnje Bijele tabije. Također, treba spomenuti i sljedeću činjenicu koja ide u prilog prethodnoj tezi. Grad Hodidjed, tj. njegov naziv, će biti prisutan i u nazivu vilajeta (vilajet Hodidjed, odnosno, vilajet Saraj). Ovo govori da je grad Hodidjed morao biti blizu mjesta na kome je saraj, tj. dvor.

Vrijeme nastanka grada Hodidjed je kraj XIV i početak XV stoljeća. A s dolaskom Osmanlija grad Hodidjed vremenom će postati dio kompleksa zidina, tabija i kapi-kula koje će se graditi intenzivnije poslije provala Eugena Savojskog 1697. godine. Vremenom će grad Hodidjed doživjeti i promjenu u nazivu, ali i u arhitektonskom izgledu, pa će se zvati Bijela tabija. Evlija Čelebija je zapisao da se Bijela tabija naziva tako zbog krečenja u bijelo. Na osnovu zapisa i crteža iz XVII st., pa i opisa kojeg daje Evlija Čelebija, Alija Bejtić je uradio rekonstrukciju srednjovjekovnog grada Hodidjeda, tj. njegovog izgleda prije gradnje odbrambenog sistema (zidina, tabija i kapi-kula) na Vratniku, tj. prije 1729. godine. Tvrđava je imala pravougaonu osnovu sa kulama kvadratne osnove na uglovima i petu kulu iznad kapije - ulaza. Zanimljiv podatak je da su arheološkim iskopavanjima vršenim 1991. god. na Bijeloj tabiji otkriveni temelji tvrđavske džamije (posvećena El-Fatihu). To je česta pojava u Bosni da u utvrdama Osmanlije u vremenu fetha (osmansko osvajanje Bosne) grade džamije za posadu utvrde. Dakle, u Sarajevu su dvije džamije nosile naziv po sultanu El-Fatih: spomenuta tvrđavska koja je korištena za potrebe posade i Careva džamija koju podiže Isa-beg Ishaković 1457. god.

Nakon provala Eugena Savojskog, te poslije Karlovačkog mira 1699. god., te sklopljenog mira u Požarevcu 1718. godine, Osmansko carstvo je u defanzivi, a Sarajevo je na udaru. To su razlozi zašto se kreće u gradnju zidina, tabija i kapi-kula. Izgradnja spomenutog fortifikacionog sistema je trajala od 1729. god. do 1739. godine. Tim radovima utvrda na Vratniku, Bijela tabija, koja je na temeljima Hodidjeda, definitivno mijenja svoj izgled i karakter i dobija prepoznatljivi poligonalni oblik. Važno je spomenuti da je u Bijeloj tabiji postojala tamnica, i naravno džebhana (oružarnica). U podnožju Bijele tabije nalazila se baruthana (skladište municije). Spomenuta džamija u utvrdi je postojala sve do 1811. godine. Tabija će u narednim godinama doživjeti više obnova. S XX st. Bijela tabija će sve više propadati, ali i izazivati interesovanje zajednice i pojedinaca za temeljitu analizu njenog nastanka i povijesti. Tako je i danas, gdje se arheološka istraživanja uporedo s građevinskim radovima izvode na Bijeloj tabiji i daju nadu da će ponovo zablistati ponad grada svojom bjelinom.



Alija Ibrović, dipl. orientalist

Aleja ambasadora

Ambasador Kraljevine Danske NJ. E. Niels-Jorgen Nehring je 25. avgusta 2009. godine uz asistenciju načelnika Ibrahima Hadžibajrića i predsjedavajućeg Općinskog vijeća Rizaha Avdića zasadio 87. po redu lipu u Aleji ambasadora. "Velika mi je čast što mi je pružena mogućnost da zasadim lipu u Aleji ambasadora. Širom svijeta postoji mnogo ceremonija, ali ovo je za mene najljepša za koju sam čuo, jer je drvo nešto što je živo, a za mene su život i Sarajevo jako povezani. Prije mnogo godina sam bio u Sarajevu kao turista, a nakon toga iako izdaleka pratio sam sva dešavanja vezana za Sarajevo. Pratio sam lijepe i dobre trenutke i naravno sa tugom sve one događaje koji su se desili 90-ih godina. A onda, nakon svega, posebna čast mi je bila ponovni dolazak u Sarajevo, ali ovaj put kao ambasador" kazao je Ambasador Kraljevine Danske NJ. E. Niels-Jorgen Nehring. «Ambasador Kraljevine Danske NJ. E. Niels-Jorgen Nehring završava diplomatsku misiju u Sarajevu i vraća se u svoju domovinu. Upravo smo razmijenili neka iskustva gdje mi je njegova Ekscelencija obećala da će aktivno djelovati u diplomatskim krugovima na što bržem uključivanju Bosne i Hercegovine u Evropsku uniju» rekao je načelnik Općine Stari Grad Ibrahim Hadžibajrić.



Polaganje cvijeća u Bakarevića ulici

Šesnaesta godišnjica masakra u ulici Bakarevića br. 5 obilježena je 26. juna 2009. godine. U znak sjećanja na sedmero ubijene djece koju je usmrtila agresorska granata dok su se igrali, delegacije Kantona Srajevo, Grada Sarajeva i Općine Stari Grad Sarajevo položile su cvijeće na mjestu masakra.



Načelnik Hadžibajrić primio taekwondo reprezentaciju BiH

Načelnik Općine Stari Grad Ibrahim Hadžibajrić primio je taekwondo reprezentaciju BiH koja je ostvarila historijski uspjeh na evropskom kadetskom prvenstvu u taekwondo-u održanom od 26-28. juna 2009. u Hrvatskoj. Zahvaljujući članovima taekwondo klubova "Zlatni ljiljani" i "Fojnica", Bosna i Hercegovina je prvi put u svojoj historiji dobila evropskog prvaka u jednom olimpijskom sportu. "Općina Stari Grad se rado uključila u podsticaj vrhunskog sporta i sportista u BiH. Taekwondo klub "Zlatni ljiljani" će i ubuduće imati podršku ove Općine, koliko smo u mogućnosti, a nadam se da će ona biti značajnija i veća nego u ovoj i prethodnih godina. Napominjem da smo mi sufinansirali i džudo reprezentativce sa područja Općine Stari Grad koji su se takmičili na Mediteranskim igrama. Naša pomoć nije uvijek u vidu novca, nego ima i drugih načina, kao npr. obezbjeđivanje prostorija za rad, prijevoz, avionske karte i slično. Sport zbližava ljude i učinimo sve što je u našoj moći da naši mladi, talentovani sportisti idu na takmičenja i osvajaju ovako značajna priznanja," rekao je načelnik Hadžibajrić. Predsjednik Udruženja "Zlatni ljiljani" Ahmet Dilek uručio je zahvalnicu načelniku Hadžibajriću za pomoć i podršku klubu u njihovim zalaganjima da odgoje buduće vrhunske sportiste i kvalitetne ličnosti koje će ponosno predstavljati svoj narod i svoju zemlju u čitavom svijetu.

